

太倉州志卷二十一 原修

人物五 古今人傳

國朝

錢本誠字胄伊濤子雍正五年進士改庶吉士授編修十年典試廣東乾隆三年復典試廣西晉贊善以親老乞歸旋卒年四十九本誠留心經濟在詞館日嘗手疏當世利病爲一書名待致草弟枝桂字林一雍正十年舉人有文譽

王斌字允兼立心行善見義必爲雍正十年海潮災道殣相望請於當道捐資千計捨棺施藥置塚設倉遠近利賴乾隆二年督撫具題議叙縣丞選新會後補東陽旋告歸卒年七十四

王應麒字漢超遇賓曾孫母葛病藥弗效焚香禱天割左臂肉煎湯進病頓愈越數年母病復發又割右臂肉以進人稱其誠孝

顧清振字選一入資捐通政司經歷隨父宦漢中不赴選父卒護喪歸嘗傾資爲從父鳴周完官欠無吝色建宗祠鋟家譜悉力不倦卒年七十四

陸碧字漢雯監生年十二母病危欲刲股和藥進方舉刃倉卒聞履聲誤披其脣母見涕泣止之母歿哀毀若

成人生平重然諾好施予鄉里推之卒年七十五
金鯉字乘上幼喪母哀慟如禮事父及繼母尤孝謹繼
母病延醫進藥逾年無少懈遭喪以毀致疾乃力疾營
窀穸比蕘事而歿

黃機字聖猷少時以戶役事代父勞父喪祭葬盡禮不
以諉兄弟母得哽噎疾甚劇刺血作禱祠願減已益母
算果至七十六而終棺殯堂中比鄰不戒於火風急將
爇機繞棺長號風卽返見者驚歎

張文華字晉侯歲饑與妻常食糠粃而以甘脆奉親父
疾割臂肉和藥進母卧病中衣廁牖之屬手自潔除居

太倉州志

卷二十一

人物五

二

喪哀毀幾滅性卒年七十

李崧字豐千事親以孝聞友愛昆弟遇親族故舊恩意
周摯鄉黨推之

沈璜字天來歲貢生父聖階以事被收訴於州得釋弟
洪普充州吏以漕米紅腐將獲罪璜毀家丐貸得免工
書法徑尺大字人爭寶之卒年七十七

胡鳳階字于岡性孝友母墮河入水抱母出讓產兩弟
獨嫁女弟四人葬母黨四世九棺入貲授蘭山令整風
俗建書院頗著勞績

盛大椿字九如諸生父疾且殆割臂肉和藥進母病如

之俱獲瘳知州王延熙旌其廬同時顧椿胡起宗王庭蘭俱割臂肉療親疾皆愈

趙松字萬齡監生三歲失恃鞠於繼母曲盡子道父病篤刲股煎湯進得愈母柩未葬海潮衝決松以身抱柩洪濤急溜浮蕩一日夜卒無恙族祖宦光三世葬吳縣寒山并有祠歲久爲人占據控當道復之卒年七十八張德肇字儀仲歲貢生娶室日帷帟皆母手紉德肇珍之雖補綴弗敢易也父所束布條亦終身藏之篤友于課其弟成立爲置產從弟失產亦教養之從祖歿後四柩在淺土爲歸葬先塋卒年八十餘

戴興宗字尙賓生三月父亡母劉守節嘗卧病久興宗夫婦侍湯藥十餘年如一日每行義事必稱母命歲禋捐米施粥知州王鎬重其行給額旌之卒年七十一陸岡齡字疇五雍正二年舉人文章行誼爲流輩楷模旣歿門人立祠西關外祀之

凌燔字孝述歲貢生博涉經史爲文獨闢畦徑自然深秀間爲詩歌以自陶寫

凌士錫字綏章雍正四年舉人會試不第遂絕意進取生平研玩小學近思錄宋五子書事母孝守身治家俱有矩矱里人稱爲眞孝廉

顧廷桓字雙栗雍正元年順天舉人善屬文李紱亟稱之與兄陳埏有二難之目所交皆知名士卒年六十一毛之玉字用羽序子少稟家學詩仿眉山劍南填詞尤工雍正八年成進士改度吉士授編修擢河南道監察御史乾隆元年疏請抑奔競除訟蠹旋丁父憂以事左降不復出主虞山書院十四年造士頗多晚輯縣志卒年八十六

朱振玉字彙九雍正四年舉人爲文匠心獨造教授里中方矩濶步以師道自任有至性會試旣入闈忽心動卽棄卷出兼程而歸則繼母病革不起遂終身不復試

太倉州志

卷二十一

人物五

四

卒年六十七

陸松齡字鶴芬諸生爲人有矩矱績學不倦嘗續修沙溪志

朱叙字端揆諸生雍正七年以沈起元薦赴部投牒念母切忽心悸遂告歸叙撫弟妹有恩義與人交不欺然諾詩文皆有師承書法學米襄陽

陳鉉字宏猷少讀松陽講義慨然有求道志家習農年十五父命之耕欣然就耒曰事所當事卽眞學問也少休便勤讀鄉居教授著四書晰疑就正錄學政尹會一雷鉉皆重焉沈起元亦數與往還講學卒年七十三歿

後 詔纂四庫全書弟子王濤上於總裁官錄入附存
書目

宋賓王字蔚如幼喪父奉母極意色養居市廛治銀爲業篤好詩書稍閒卽吟詠鈔錄不輟尤究心字學手校書籍辦駁正訛輒爲善本同里沈起元顧陳埒稱其學有根據鎮洋知縣金鴻修縣志聘請分校人稱宋布衣王嵩字穎山諸生端雅有志節少學詩古文於叔父時憲時翔名譽日起幕游豫章大梁旣歸益刻勵爲詩知縣金鴻聘修縣志商定爲多從弟輅字素威尤工詞得姜史之遺

鄒以敬字魯望研覈經義精於三禮尤究心道學約同人爲講會每日必以讀書所得者記之有常惺齋劄記所著史論詩古文均佚其同閔顧駿業字蘊生少孤聞以敬與同學爲考課往從之領其指授卒爲名諸生吳德怡字順之偉業孫諸生乾隆元年舉孝廉方正辭不就生平學博而精尤熟宋儒語錄卒年四十八陸宏緒字百和雍正元年順天舉人乾隆七年會試取明通榜選太平教諭陞羅源知縣廉潔奉公以親老告歸工詩卒年六十六次子元達字若泉乾隆二十五年順天舉人官當塗訓導以培植人材爲事年六十卒官

四子元邁字沁雪乾隆三十年舉人文才英特與王瑜
毛上貺朱璿等結詩社有名於時

楊宗時字繼山子龍子選貢生少有才譽工吟詠制舉
義力矯時趨一軌於正竟以攻苦佗僚歿年四十三
錢斌字兼之汝駝子少工聲偶商邱宋犖採其詞入吳
風錄其題三高祠詩尤膾炙人口乾隆元年舉博學鴻
詞未用卒

陸棻字佩芳諸生通經學尤邃於毛詩嘗作詩義質疑
於春秋左氏傳亦有論著

毛詠字宣夔之玉子乾隆十三年進士改庶吉上授編
修十七年假歸歷主常州龍城及婁東書院以喪子鬱
鬱不樂邁疾卒詠天性孝友與人交無城府詩古文詞
宗法歐蘇歿後諸生立祠城南歲時祀之

王恭字禮言性恬淡棄舉子業深造於詩以王孟爲宗
南園本王錫爵別墅恭招朋好觴咏其中集其詩爲南
園風雅卒年七十三同時有邢桐字嶧陽自沙溪移居
西城著有草色餘言集恭爲之序

王愷字存素諸生性情高簡工詩清微澹遠以王韋爲
宗尤工畫入原祁之室長子廷銓字心菴諸生博雅能
詩晚歸淨業次子寶林字淵如喜吟咏傳畫學早卒

邢之煥字玉藻監生敦行慎交性閒靜工吟咏祖虞音季父陶民本以能詩著之煥繼之益工

黃昌言字仲常諸生師事盛金慎爲章句之學晚與王恭鄒以敬游頗事吟咏弟玉蟾字芬桂八九歲熟四子小學諸書少長五經周禮三傳俱卒業年十三補諸生卒年僅十九

王筵字侍經以康熙己酉生至乾隆戊子歿壽百歲家故貧筵勤操作務節儉衣食粗給弟欽文貧乏資其養贍鄉里稱之

王莢字大容乾隆十二年舉人力學好古爲里中名師

太倉州志

卷二十一

人物五

七

性敦篤居喪哀毀盡禮年七十餘卒

邵嗣宗字鴻箴乾隆十七年會試第一改庶吉士授編修擢中允陞侍讀以疾乞歸未及一載卒嗣宗立志耿介至性敦篤詩文淹雅溫粹與毛詠齊名其教子弟則曰君子持身無過廉儉二字不儉則不廉不廉則無恥聞者以爲篤論

陸寅亮字嚮直歲貢生父岳諸生家素封盡出以購書籍沈德潛未第時過訪輒留旬日與談文藝寅亮髮未燥聽受悉能領悟中年造詣益精金壇王步青合刻婁東十子文寅亮與焉以歲貢當爲教官未及選而卒

王鈺字兆堅歲貢生家貧事親以孝聞工楷書爲文法先正里中咸師事之選青陽訓導未赴卒

顧成志字心勿諸生襁褓育於張氏後復姓誠其子以張爲重名祭埽必兼承二姓幼嗜詩晚年益工卒年六十七子張思張傳俱諸生稟承家學閱覽博物張思擅考據著述尤富

王濟美字繹元世貞後乾隆十七年副貢學術該洽尤工經義遠近宗之

郁臺字漢模諸生閉戶讀書與顧成志等相切劘時記所得以資觀省有安貧頤道之風

太倉州志

卷二十一

人物五

八

錢琥字曼承諸生性廉介喜周急好爲章句之學至老不倦從游者甚眾

錢文梓字泗良渭子乾隆九年舉人授天鎮知縣邑有大石莊與陽高接壤陽民遏上流莊民爭之乃議設牐更番啟閉兩邑竝受其利邑故有劇賊某爲民患以計掩執之歷署大同暨保德州引疾歸卒年七十二子敬熙字亮廷諸生 召試列二等仕至湖北沔陽知州
王鳳儀字廷和暮孫乾隆十二年舉人授宜城知縣調漢陽望吏議旋復職由犍爲縣歷陞成都知府擢松茂兵備道丁內艱服闋再補松茂調永寧再調陝西鹽法

道引疾歸卒年七十鳳儀負幹濟才在四川時值官兵進勦大小金川羽檄旁午總督文綬留司章奏在府道任內勘辦水災緝治姦宄松茂番民有佛子重來之頌尤工詩畫能承其家法弟鳳超字宗美事母孝耘字涵青官諸暨丞修隄堰以禦水災蒞任三年卒

周洵字學蘇乾隆十二年順天舉人授宣城教諭陞湯溪知縣調金華所至清積案決疑獄憂歸起補虹縣攝懷遠定遠清理獄訟如浙時陞順天糧馬通判蠲苛政汰冗役以疾歸卒年七十二弟淳字希陳乾隆二十五年進士授清谿知縣地當孔道困於役淳善撫循不以

累民調荔波蓋新闢苗疆也淳治以簡靜會知府欲興山谷之利淳持不可因改鳳陽府教授歲餘卒於官陸源字宗潮乾隆十八年舉人授泗水知縣決疑獄有嚴明聲邑東南地無并民苦遠汲相土脉坎之葺書院延名師主講絃誦以興後改教職選婺源訓導勤教育十餘年如一日移疾歸卒年六十九

王宸字子凝原祁曾孫乾隆二十五年舉人由內閣中書授武昌同知擢永州知府以安靜爲治王氏承時敏原祁後子弟多以畫名而宸爲最旣任永州縱觀山水以造化爲師益臻精妙然不屑以資干進罷官後留武

昌卒年七十八從弟寰字定九乾隆四十二年舉人工
詩文思力劂刻不作凡語嘗遊雁宕山樂其幽奇不忍
去寓書兄宸作圖以見志焉

談理字羲民居璜涇以經義鳴里中乾隆二十六年進
士選合水知縣性疏拙不能事上官罷歸未幾災振案
起理獨免

張郝元字吾山叙子乾隆三十年舉人授旌德教諭攝
南陵縣事旋罷歸郝元少承家學淹貫經史罷官後客
游豫楚屢主書院講席皆有教規子景江字永叔嘉慶
十五年舉人幼著文譽性高簡不喜干謁家貧斷炊丹

太倉州志

卷二十一

人物五

十

黃不輟生平淹貫羣籍尤通天文厯算晚歲潛心學易
著有易義若干卷

王士登字民綱諸生粹於性理詩宗陶韋卒年七十一
方青選字範西以歲貢授沐陽教諭地僻而瘠文教未
孚青選至卽勤課之嗣是多獲雋者邑有桑墟鎮儲麥
備荒大吏檄委給振所儲腐敗亟請以粟易之忤有司
弗恤也以老告歸卒年七十九

張瞻洛字文江以貲授安陸通判擢大理知府瞻洛初
蒞楚北勘災督振民德之在滇剔積弊懲豪強境內肅
然以會鞫僞案罷歸卒年八十一

滑士麟字穎儒拔貢生以資官雲南白鹽井大使滇屬邊境文教未孚士麟善化導士始向學以疾卒官滇人立祠祀之

畢澐字涵青沅弟乾隆二十四年舉人授德興知縣有吳姓兄弟爭產訟數年不解澐以一體曉之遂相持感泣如初署甯都知州甯都介兩湖衝號難治澐悉心審斷八閱月清積案百五十起值米貴請發常平倉未報亟勸富戶出粟以糶市價頓平年三十五卒於官

王璇字若華學璧子以貲補貴陽府札佐巡檢會緬甸用兵調營委解軍裝積勞成疾卒子廷偉字卓人以軍

功議叙從九發江西前後攝篆十九所至有聲最後補鄱陽縣石門巡檢歲滿告歸卒年八十二

周緯字欽文以議叙府經歷發貴州其地苗蠻雜處日相爭鬪緯皆撫以仁信無不悅服洊擢至雲南迤西道卒於任貧不能返葬邊民爲負土營冢

李翹鳳字罕階工書以順天鄉試挑取臚錄議叙補甯州吏目革除彭原驛輸納薪草民德之爲立生祠旋里家徒壁立杜門課孫卒年八十六

邢鳴珮字德音信實謙恭與兄鳴球相友愛乾隆二年巡撫邵基以碩德具題 賜八品銜

張月鹿字思遠諸生事親色養喪祭無違禮祖祠在鎮民橋旁土豪欲佔其地白於巡撫禁止之平生敦睦親族有古人風卒年七十二

林晃字啟明歲貢生少有雋才持躬敦厚叔穎秀老而無倚晃迎養之歿後撫其孤孫成立卒年七十四

曹扶蒼字鴻儀諸生賦性夷曠泊聲利嗜詩文居家以孝友忠厚訓子孫卒年八十七

毛成肅字孝則監生事親能養志好施予族黨以困乏告周卹之無吝色卒年八十

呂徐行字子循歲貢生家貧好學兄歿撫遺孤如己出

太倉州志

卷二十一

人物五

十二

卒年七十一

柴熙元字近愚諸生爲人醇謹謙和好行善乾隆二十年歲褫官設粥廠竭力襄事瘞棺之無主者卒年八十七

應經營字剛中諸生先世由永康遷州經營人品端慤家貧教授自給非義不取人以匱乏告餅有儲粟輒分與不少吝年七十餘卒子嘉穎清介自守卒年八十餘孫伸蒙諸生立品如其祖父云

李學字仁山監生父維德以節儉起家力行善事慎交游然諾不欺學有父風見人緩急周卹之晚年益敦善

行延師教子曲盡禮敬子孫多以文學起家

王國瑛字德華諸生讀書敦品持身不苟兼知醫理
陸九磬字貽則歲貢生事親孝交友久而能敬屢試不
遇學益精粹後應聘修淮關志稱博雅卒年六十九
楊瑞華字蔭年諸生以貲授中書科中書性孝父患風
痺晝夜扶持衣不解帶者三月兄歿撫孤姪如子性坦
易尚氣誼或以緩急告傾囊贈之
陸時化字潤之恬子監生好藏書畫賞鑑精確子愚卿
字願吾候選布政司經歷善寫山水花鳥購求法書名
畫度置愈富孫因儀亦嫻繪事

太倉州志

卷二十一

人物五

十三

李坤元字成萬工堪輿術尤留心邑中文獻搜採頗多
何蘭字畹芳廩生爲詩文才氣橫溢應鄉試有同舟者
卒於京口爲治棺斂至金陵有戚疾病蘭醫治百方及
卒斂而扶其柩以歸其敦氣誼類此

張文忠字季諤性儉約好行義乾隆十二年潮災牆屋
圯米溼計百餘石文忠立造土竈用甑蒸米招鄰里計
口分給米盡繼以穀穀盡繼以麥兩日中傾二百餘石
後遷沙溪值歲稔設粥捨棺至老不倦卒年七十八
金詩學字肄三人貲得知州銜戚屬徐某官臨晉知縣
卒於任無子詩學助資歸其喪會海潮災知州設粥平

糴贊襄振務全活甚眾卒年六十三

邢德厚字坤元監生乾隆年間歲饑米貴前後平糴共數千百石復捐錢助振巡撫莊有恭以名聞議叙授麻哈州判先是太倉築海塘知州屬董其事德厚陰助其費故工特堅固

胡錫鈺字大成監生由歙遷太倉家故貧以作苦積資分田贍族乾隆十七年建婁東書院錫鈺捐金助之子鵬徵孫廷桂俱力行善事有祖父風

蘇加玉字維晉諸生少從鄒以敬學詩泊遊八閩西江中州篇什益富返里以詩提倡後學同里汪學金纂婁

太倉州志

卷二十一

人物五

十四

東詩派加玉與其役所著蓼蟲吟草王槐施之勲刻之之勲業衣工嘗問學於加玉亦嫻詩

呂琳字幼輿工詩文通字學爲名諸生綏德馬豫視學浙江延入幕尋度嶺涉羅江訪友粵東無所合而歸

季夢荃字浩源乾隆三十年拔貢生選奉賢訓導少有才名爲詩一宗唐賢不落晚近家數

馮偉字偉人乾隆三十六年舉人父懷璞有隱德偉少與兄俊齊名兩上公車不第遂絕意進取平居推闡性命之旨洞徹理要爲文深於義法具體唐歸晚學攝生術卒年四十八無子以兄子恒爲後恒字立方承家學

攻古文辭簡雅有法

胡寯年字瑀章世業鹽補浙江商籍諸生內行醇篤兄蚤歿督二從子嚮學皆有成學務根柢通毛詩左氏傳詩忠厚悱惻得性情之正卒年六十三

陸觀宸字書宣諸生九歲能屬文性嗜古尤耽詩嘗從沈起元王恭輩遊詩益工卒年二十八

許培秀字毓良國榮裔孫少失怙祖樞教育之讀書嗜古內行修潔爲詩清瘦如其人

曾煜字亮工歲貢生少孤育於舅氏朱文照賴其教養癖嗜藏書見秘籍輒傾囊購之喜考正字學尤工詩興至筆隨藉以自樂

太倉州志

卷二十一

人物五

十五

張惇字萼聯瞻洛子乾隆四十五年舉人少負雋才酷嗜風雅家有日涉園時與里中諸彥爲文酒之會所爲詩清麗有則年四十餘卒仲子志鴻字耘渠廩貢生議叙選和州訓導奉檄查振邵吏胥供億遷江甯教諭科舉優行不受請託不競贄禮以憂去起補丹徒教諭移疾歸卒年七十二孫元培字允植讀書過目成誦尤工經義所成就多知名士咸豐十年成進士年五十餘矣用刑部主事假歸旋卒

李祥鳳字東標乾隆五十一年舉人由知縣左遷黃梅

縣丞擅六法世多重其畫謂得司農正傳

毛濟美字稼夫與其友王朝紳募捐相葬局歲埋骼以數百計至今踵行弗替

錢元熙字履吉文梓子乾隆四十四年舉人澹於榮利以典籍自怡規言矩行絕口不談人過嘉慶元年舉孝廉方正 賜六品頂帶截選知縣改歙縣教諭數載引疾歸卒年七十子襄字皋謨廩生穎敏能文兼工書法年僅四十餘卒

錢鳳孫字翼翔涓孫諸生喜藏書涉獵史傳爲人篤行誼重然諾里中有義舉必審求實是爲之倡率學舍圯

太倉州志

卷二十一

人物五

十六

鳩錢庀材復其舊嘉慶九年及道光三年兩遭水災設法振濟不遺餘力癸未水尤大城內外漂棺千計爲買地安葬他陰行善事尤夥歷數十年如一日卒年六十
七子三長寶琛自有傳寶瑛道光二年舉人亦以行誼稱鄉里能任事雖傾身負累弗恤也任沛縣訓導歸里卒

胡仲槐原名槐字右植諸生性仁慈以利濟爲事遇喪紀悉用古禮先是邑有道斃者土人因緣株累仲槐募資設局殮埋人多便之卒年七十一

陳某圻人居北關父疾刲股進卒死或覩其臂肉剝處

叩以故堅不肯言噉然而哭同業者道及其父平生事輒嗚咽不自勝得傭工錢必市甘脆以奉母焉
錢金堂字會東監生屢應舉不遇父緣事戍邊與弟玉堂往返萬餘里踐更省侍卒遇肆眚奉父歸

李錫恭字協襄學子少年奮志讀書夏日苦蚊以足納甕中讀至夜分無倦嘉慶元年成進士改庶吉士授編修九年 駕幸翰林院賜宴聯吟錫恭立賦詩以進賞賚甚厚歷官至侍講學士以疾歸卒弟錫信錫瓚錫惠錫晉竝舉人錫瓚尤工制義遠近學者奉爲科律官華亭教諭卒年八十一錫信子汝昌拔貢生亦能文名與

太倉州志

卷二十一 人物五

十七

諸父埒

畢憲曾字季瑜父瀧工書畫精賞鑒家藏甚富憲曾乾隆六十年舉人少爲外舅顧光旭所賞詩文得其指授弱冠游秦謁華陰廟效昌黎體成三十韻句特險峻一時名士皆斂手中歲所詣益精文學唐歸詩之至者在韓杜間性落拓家人生產置弗問日坐卧一榻讀書飲酒不輟卒年七十弟熙曾字耀裘諸生喜吟咏善分隸兼工篆刻從子文玉字懷之諸生工詩早卒

蕭揆字振西嘉慶三年舉人制義根柢經術課弟子嚴立程法經訓悉本口授皋比重席人比之高密焉詩亦

簡雅有法

蕭掄字冠英廩生與兄揆齊名經術湛深才華富瞻好爲齊梁麗製客錢唐陳文述家聯吟昕夕長篇短韻名擅一時著述甚富其釋車一書尤精核能補前人所未及嘉定錢大昕序之

徐校字範莊恩貢生生有高稟讀書嗜古爲文深明義法宗仰歸有光汪琬晚年壹意著述哀輯漢魏至明文爲一集 國朝文爲一集積百餘冊露鈔雪纂至老不輟卒年七十一

陸學欽字敦書嘉慶五年舉人少孤力學讀書神解詩

太倉州志

卷二十一

人物五

十八

文書畫俱臻超詣善鼓琴喜習靜中年失明連蹇以卒年四十四兄學錦字仲章諸生亦工詩

胡金誥字晉階生而穎異美風姿文章詞賦名滿士林嘉慶六年拔貢生以疾不赴 廷試年四十餘卒

徐階泰字正寅階升字允南竝副貢生有文名父鴻達乾隆四十四年舉人邃於經術爲邑中名師階泰尤善論文導源於隆萬啟禎暨 國初諸大家指示義法口講筆授人益嚮學其友繆文溶字瀛海嘉慶二十四年舉人以經義教授鄉里學者奉爲圭臬王鉅字輔功陸錫眉字昌魯俱由舉人任教官精制舉業爲稠人宗師

名與階泰參起焉

孫圯字嘉玉諸生讀書嗜古隱迹江村饘粥不繼嘯歌自適嘗作村夫子傳以自寄晚喜與方外交無疾而卒畢華珍初名喬珍字松心憲曾子少承家學詩古文沈博絕麗幾突過諸父遊京師聲譽大起中嘉慶十二年舉人爲知縣浙江非其志也罷官後以詩酒自娛年七十餘卒從子庭杰咸豐五年順天舉人女夫趙兆熊諸生詩文能承其學錢寶琛輯州志與纂修之役

倪景曾字亦魯爲賢孫監生精疇人術嘉定錢大昕三統術衍稱善本景曾恐學者未能通曉推統術紀術之積數著爲圖說又作周官祿田考稱精核歿後三統術衍圖說有缺佚顧思義衍而補之

張懋勳字仲襄父元徵歲貢生敦品力學懋勳嘉慶十三年進士授南漳知縣母老改昌樂母憂起補原缺歷官所至待士以禮撫民有恩分校鄉試識拔皆得人居官二十年家無餘資卒後南漳士民爭賻之始得返葬戴繩武字鳴皋居沙溪幼承父訓以行善爲事鄉里稱戴善人知州張作楠廉其實給額以旌

錢錫榮字守仁諸生幼孤貧母茹苦撫之稍長授徒得修脯養母母歿請旌於朝姑適徐基早寡無子基弟

其外舅也亦無子歿後皆任其喪葬春秋爲之展墓
王應鶴字冠廷嘉慶二十一年舉人弱冠始發憤讀書
務窮根柢凡經史小學及天文地理醫卜釋老家言靡
不精究其學自明道康節以上追孟氏而於元明以來
諸儒一空依傍尤留心經世會濬劉河條議上巡撫林
則徐多采其說又嘗以高攀龍集貲備荒法告同里舉
行之道光二十九年邑大禋事賴以濟節孝彙題例初
定應鶴創議採訪請旌州之建節孝總坊自此始卒年
七十六妻弟錢敬堂字魏勳諸生亦潛心理窟終身不
倦

錢寶琛字楚玉鳳孫子嘉慶二十四年進士改庶吉士
散館授編修道光元年督學貴州母憂歸旋丁父憂服
闋入都十一年授歸德知府甫履任清積案百數十起
歷浙江督糧道雲南按察使浙江布政使十七年擢湖
南巡撫時苗疆歲歉奏借口糧籽糧以資接濟又請禁
湘鄉縣磺礦停寶南局鼓鑄及毀沿湖州縣私築堤垸
民稱便明年改江西江西爲楚鄂門戶官兵道南昌譁
寶琛廉得實寘剋餉營弁及滋事兵丁於法自是他省
兵入境相戒莫敢犯二十一年調湖北未赴移疾歸寶
琛廉以律已寬以御眾自通籍至大官被服儒素食不

兼味歸里後以詩文提倡後進者垂二十年尤留心桑梓事如輯志乘興水利樹桑育蠶不憚躬爲倡率鄉里至今稱之卒年七十五

徐元潤字雲伯嘉慶十五年舉人授宜川知縣縣鄰山西趙城會奸民滋事元潤嚴飭守備事旣民不擾母憂起補城固最後補白水其地五門堰以渠水灌田歲久興訟連年不解元潤悉釐其弊費省而利益溥陝督林則徐亟稱其賢欲論薦以病不果歷數縣每以文教飾吏治每行縣車前執詩文請質者甚眾有片長獎借無餘力士以此德之卒於官年六十二祀白水城固洋縣

宜川紫陽名宦元潤綜覈今古能厲風節詩初學元劉晚年才識閎達不名一家文超邁拔俗爲時推重

金澂字憲清嘉慶二十五年進士授順甯知縣邑有土棍爲民害年且耄前令莫敢詰澂至訪其子械之庭曰若不能養而使父若此大不孝國有常刑則又召其父曰若老矣若子大不孝使若亡賴吾且爲若殺不孝子則搏顙出血曰願無殺吾子吾知悔其子復涕泣乞哀釋之卒爲善士旋擢武定州知州其地土風樸陋教以讀書爲文之法拔其秀良親課之自是有膺鄉薦者陞永昌知府會回匪滋事晝夜城守疾作諸代竟罷歸澂

制義推巨擘里居杜門卻軌人罕見其面惟以文字就正者則啟迪不倦卒年七十五

王寶仁字東壁嘉慶二十四年舉人任六安訓導自幼操行醅謹自爲諸生善僚壻嘉定葛其仁獲聞錢大昕王鳴盛兩先生緒論始銳意治經貫串注疏衷以義理尤留意鄉邦掌故與同志編輯婁水文徵既官六安益肆力古學六安人士咸推重之年六十四卒於官其門人趙以錕弱冠補諸生耽嗜經籍有志根本之學卒年僅二十四

黃元灝字學海嘉慶二十四年舉人授江都教諭咸豐

太倉州志

卷二十一

人物五

二十二

三年二月粵匪陷揚州或勸之去元灝曰死我分也將何往公服之明倫堂賊至曳之走元灝有拳勇以徒手搏賊竟斷臂而絕僕陸元從死

陸鼎亨字凝仲父元吉嘉慶三年舉人事親孝嘗於州守座間懷荔奉母知州鼇圖繪圖紀其事鼎亨幼卽嗜學中道光二年舉人研覃經史以古人實學自期卒年僅三十六無子以族子文海爲嗣文海縣廩生好學能文亦早卒

季錫疇字範九諸生篤嗜經籍丹黃殆遍古文詞具有矩矱卒年七十一

陸希湜字守初學錦子道光十八年進士授禮部主事
歷員外郎中時御史某請行僧道度牒下部議希湜適
掌印力爭謂無補國用適足滋奸蠹事得寢咸豐三年
授潁州知府時寇盜蠡起希湜至剿撫並用招降捻黨
金玉華汪明魁命爲前導所向克捷敘功以道員用調
署安慶知府七年捻匪復熾檄回本任至則敗賊於三
塔集期明日復戰甫回營以痰疾卒 贈光祿寺卿希
湜治軍民有威愛去潁時潁人泣送者千百及卒籲大
吏奏祀名宦四鄉立私祠祀之兄子爽棠字憩雲咸豐
元年順天舉人入貲官刑部主事入直軍機處歷員外

郎中以積勞成疾卒年六十三

孫壽祺字錫祉道光二十四年進士授刑部主事假歸
佐福州將軍文煜軍敘功授柳州知府甫履任裁典商
陋規禁吏胥侵蠹通飭所屬懲誣告勤聽斷訪訟棍積
弊一清府署燬於兵重建之不以累民旣成大書清慎
勤三字於堂以自警又其地遭寇亂絃誦歇絕乃月督
州縣振學校興書院拔其俊髦資以膏火文治蒸蒸日上
上任三載會新任道某以賄聞壽祺與齟齬竟中計典
降調歸士民泣留不得舉人吳某贈詩云公到柳州公
獨窮公去柳州民無宗柳眞累公公愛柳公不棄柳柳

負公歸七年卒年六十四壽祺遵家禮作家祭圖說平生服膺近思錄尤厭聞二氏說臨歿遺命禁浮屠氏勿焚紙錢衣服識者以爲能自拔於流俗云

陸增祥字魁仲廷珪孫道光二十四年與兄增福同舉於鄉三十年以進士第一人授翰林院修撰咸豐元年母憂歸三年青浦土寇周立春犯太倉敘團練守城功加五品銜以贊善卽補六年充會試同考官十年授慶遠知府行及湖南巡撫毛鴻賓重其才奏留以道員用歷署糧儲道鹽法長寶道積功加布政使銜光緒二年補辰永沅靖道其地與黔蜀錯壤爲羣盜淵藪增祥名

捕其首置之法凡民苗獄訟必持平以是皆悅服又廣苗疆書院額勤督課士益嚮學居官四年減徭役勸耕作與民休息五年省墓歸八年六月丁卯卒於家年六十有七增祥在官不廢學性好金石文字著述甚富聚漢魏以來古甄至數千擇佳者手製爲硯晚年作古今字表未卒業而歿子五仲子繼輝由編修出爲汝甯知府

錢鼎銘字新之寶琛子道光二十六年舉人咸豐初由教習選穎榆訓導援例授戶部主事九年父憂歸十年粵匪陷省城盡覆江南郡縣官吏士民相率棲上海勢

岌岌乃謀乞援於總督曾國藩時安慶新復國藩親往視師而下游長江上下千餘里賊壘林立眾相顧莫敢任鼎銘慨然請往卽日乘輪舟溯江西上兩岸賊礮洞穿船腹過鼎銘危坐不爲動至則力陳百姓阽危望王師如時雨繼以泣又論列東南形勢賊情變幻及蘇常可取之狀國藩感其誠許濟師鼎銘往來轉運糧餉軍食無乏不數年粵捻兩匪以次削平功最同治七年授直隸大順廣道數月陞按察使尋遷布政使越二年擢河南巡撫會法人擬於南陽城中開教堂民弗便也教士安西滿挾總署書求見鼎銘盛陳兵衛門洞開坐堂

皇呼使前反覆辨論千百言教士語塞惛息喪氣退事獲寢旣乃練軍實濬河渠興保甲又飭各州縣廣儲積穀後連年荒歉民賴以濟光緒元年以頭瘍卒年五十二河南暨本省大吏先後請於 朝得 旨宣付史館立傳本籍地方建專祠謚敏肅

陸宗泰字耿文咸豐二年副貢生少負雋才工詩文粵寇陷州城義勇起宗泰作討賊檄夏寶全大書刊板及曉示脅從者反正檄人爭誦之事敗憂憤成疾卒其同年生柴文杰工詩精楷隸讀書目數行下以跖弛不遇年四十餘死

凌纘高字孫瞻大興籍增監生甘肅候補州同知署張掖縣丞同治八年十月籌辦糧餉赴郡至甲子墩遇賊力鬪死

胡汝僖字希寶附監生安徽候補從九署霍山上土司巡檢咸豐九年八月賊竄霍山隨候補道李懷忠拒戰敗退守諸佛菴鎮賊奄至懷忠軍潰汝僖力鬪被執脅降不屈怒罵而死

蔣鼎勳字建侯諸生弟世勳文童咸豐十年四月粵匪陷州城鼎勳奉母王氏避三圖賊奄至牽鼎勳走不從縛於樹羣賊入室大索王氏方櫛投梳擲賊世勳持其

母哭賊將刃之皆趨出鼎勳斷其縛相隨入水賊犯鼎勳妻童氏大罵剝其腹腸出流地躍入水死賊遂焚其廬佃人孫寶及鼎勳之四歲女殉焉同時諸生王樹槐虞奏韶及鎮洋諸生俞嘉謨皆被執不屈死後三月諸生王元鏊亦罵賊死

張春華明工部尚書輔之裔孫咸豐十年四月州城陷被擄啖以酒肉不食賊欲焚其屋春華書壁上示弟士奎曰此吾祖尚書公宅子孫縱不能保幸免一炬吾弟慎守宗祧毋忘書畢遂自殺

李方焯字俊三諸生支鳳梧字連三文童同治元年四

月義旗起新塘市民黃鳳翔爲之魁四鄉響應方焯鳳
梧及武生陸上達督板橋營以待官軍賊騎突至拒之
殺數人奪其馬匹俄大股賊至四面環擊官軍回遠不
能救眾遂潰方焯鳳梧知事敗走板橋北清溪上攜手
赴水水淺不得沒人救之相攜入深處以死是役也鄉
民死義者不下千萬人而王桐王千金馮文達楊鳳翼
馮海隆許求陶寶和錢洪昇陳煥許維基維城維圭死
尤烈

陸雲鵬武生咸豐十年八月賊圍城雲鵬督義勇戰城
下力竭死是日義勇費學文等從知縣吳樑戰小北門

太倉州志

卷二十一 人物五

二十七

外亦敗死

趙庚成字西益諸生好奇壬遁甲家言同治元年四月
官兵克嘉定東南鄉鎮各舉義旗而西北獨無備庚成
說六河鎮人招勇以待賊漸逼勇潰留者二十餘人庚
成與之約示以信義效死弗去俄東路民團千餘人至
大喜帥以行遇賊於張涇橋殺數十人而民團遽散後
無繼曰嘻事敗矣吾不可以苟生遂力鬪而死

姜恂恂以貨紙爲業咸豐十年四月賊至居民奔避恂
恂鍵戶懸祖先像焚紙錢及己衣服大書太倉市民姜
恂恂殉難九字於壁與妻王氏及弟烈之妻節婦吳氏

同赴水死

季增泰字松泉諸生同治十年六月賊至南馬頭增泰率義勇迎敵敗被創赴水死同日戰死者有文童張國鈞而民人張炳銓拒賊小西門外童渭芸擊賊嘉定馘浜橋皆死焉

吳錫疇字洪九咸豐十年粵匪陷城被擄憤不欲生念徒死無益思殺賊而死未得間一日於厨下得菜刀陰持以出斫一賊未殊而羣賊利匕已交於胸遂遇害子增秩增鷺同被擄增秩痛父絕食死增鷺得脫歸具述其事

沈鶴清字子來諸生居劉河鎮咸豐十年七月粵匪肆掠鶴清偕父匿荒村叢竹間父爲賊得鶴清見之突出曰此老不任擔負請以身代父得脫而鶴清竟死兄鶴祚亦諸生自失弟後形神俱喪言必涕洟後二年亦被擄不屈死同時族人思謁以救父爲賊逼奮身小池中死尸植立不仆咸以爲忠憤所致云

王景曾字元卜耘孫少孤力學有經世才幕遊淮徐兩浙革漕弊訂鹽法名盛一時延請者不可千以私粵寇平總理太鎮善後章程皆手定生平篤倫理厚宗族尤留心鄉邦水利時督辦南陵何京卿愼修造門請益以

老病謝出啟開支河說授之光緒四年卒年八十一

太倉州志

卷二十一

人物五

二十九